

Headlines

- 1 चुनाव आयोग नै दिव्यांग मतदाताएं लेई मतदान सौक्या बनाने गितै 'सक्षम' ऐप शुरू कीती ऐ।
- 2 जम्मू-कश्मीर दे मुख् चुनाव अधिकारी पांडुरंग के पोले होरें डोडा जिले दा दौरा लाइयै उत्ये लोकसभा चुनाव लेई तैयारिएं दा जायजा लैता।
- 3 रक्षा मंत्री राजनाथ सिंह होरें पक्के निश्चे, दलेरी ते बलिदान लेई जोआनें दी सराहना कीती ऐ।
- 4 विश्व तपेदिक दिवस दे मौके पर राष्ट्रपति द्रौपदी मुर्मू होरें देशवासिएं गी गुजारिश कीती ऐ जे ओहू किट्टे रलियै कम्म करन ते भारत गी तपेदिक शा मुक्त बनान।

<><><><><><>

Ec. Special

भारत चुनाव कराने आले संस्थान चुनाव आयोग दी सदा इयै कोश्ट रौहंदी ऐ जे कोई बी योग्य मेदवार वोट पाने कोला खुंजी नैई जा। स्हाडे संवाददाता नै जानकारी दिती ऐ जे चुनाव आयोग नै 85एं बरें कोला मती उम्मी दे बुजुर्गे ते 40 प्रतिशत कोला मती अछमता आले दिव्यांग जनें गी घरै दा वोट पाने दी सुविधा इस बारी उपलब्ध कराई दी ऐ। एहदे अलावा हर मतदान केंद्र पर स्वयंसेवी ते व्हील चेयरां बी बुजुर्गे ते दिव्यांगों दी सुविधा लेई उपलब्ध रौहडन। एहदे कन्नोकत्री ऐसे मतदाताएं गी घरां मतदान केंद्र तोड़ी ते वोट पाने दे बाद परतिएं घर छोड़ने लेई गड्डी दी सुविधा बी उपलब्ध रक्खी गेदी ऐ। चुनाव आयोग नै सक्षम नांइ कन्नै इक ऐप बी शुरू कीती ऐ जेदे राएं इनें सेवाएं लेई ओहू विकल्प चुनी सकदे ना। एहदे अलावा मतदान केंद्रें पर पीने लेई पानी, शौचालय, व्हील चेयर, मतदाता सुविधा केंद्र, बसां लेई शेड्ड, रोशनी, साइन बोर्ड ते होर केई सुविधां बी शामिल ना।

<><><><><><>

Poonch-EC

चुनाव आयोग नै 80एं बरें शा मती उम्मी दे बुजुर्गे गी ऐगती उंदे घरै थमां गै वोट पाने दा विकल्प उपलब्ध करोआए दा ऐ। पुंछ जिले दी रौहने आली 87एं बरें दिएं निश्चित कुमारी होरें एहदे पर खुशी जाहर करदे होई चुनाव आयोग दा आभार जताया ऐ। आकाशवाणी समाचार कन्नै इस बारै गल्ल करदे होई उनें आखेआ।

<><><><><><>

CEO-Doda

जम्मू-कश्मीर दे मुख् चुनाव अधिकारी पांडुरंग.के. पोले होरें अज्ज डोडा जिले दा दौरा लाइये उत्ये लोकसभा दे चुनाव लेई तैयारिएं दा जायजा लैता। इस दरान उनें मतदान केंद्रें, आदर्श मतदान केंद्रें ते स्ट्रांग रूमस वगैरा दा निरीक्षण कीता। पोले होरें सब्बनें सरबंधत धडें कन्नै बैठक लाइयै चुनावी तैयारिएं दा जायजा लैता। बैठक दरान जिला चुनाव अधिकारी हरविंद्र सिंह होरें चुनावी गतिविधिएं दा ब्यौरा पेश कीता। उनें दस्सेआ जे जिले च 529 मतदान केंद्र ते 9 आदर्श मतदान केंद्र ना। मुख् चुनाव अधिकारी होरें उनें गी आदर्श आचार संहिता दी पालमा जकीनी बनाने लेई आखेआ।

<><><><><><>

EC-Migrant

कश्मीरी विस्थापितें गी डाकै राएं वोट पाने दी सुविधा उपलब्ध कराने दे सिलसिले गी जारी रखदे होई चुनाव आयोग नै इंदे लेई जम्मू-उधमपुर ते नमीं दिल्ली च इक व्यापक स्कीम दी घोषणा कीती ऐ। एहू स्कीम बारामूला, श्रीनगर ते अनन्तनाग राजौरी लोकसभा हल्के दे मतदाताएं लेई ऐ, जेहडे आतंकवाद दे चलदे मजबूर होइए अपना घर बाहर छोड़िए विस्थापित होई गे हे। चुनाव आयोग नै इस बारे द'ऊं अधिसूचना जारी कीतियां न जिंदे च कश्मीरी विस्थापितें गी द'ऊं श्रेणिएं च रक्खे दा ऐ, इक नोटीफाइड मतदाता ते स्पेसीफाइड मतदाता। इस व्यवस्था गी अमल च आनने लेई रलीफ कमिशनर जम्मू दे दफतर च असिस्टेंट कमिशनर रलीफ जम्मू गी विशेष मतदान केंद्र च वोट पाने लेई विस्थापितें कोला दरखास्तां हासल करने लेई जिम्मेवारी सौंपी गेदी ऐ।



Kathua-MCC

आदर्श आचार संहिता लागू होने दे बाद कठुआ जिले च गड्डिएं दी जांच दरान फ्लाइंग स्काड दिएं टीमें 3 लक्ख रपें शा मती नगदी जब्त कीती ऐ। कठुआ दे जिला चुनांS अधिकारी डाक्टर राकेश मिन्हास होरें इस बारै दस्सेआ।

.....वाईट.....



BJP-Candidate

प्रदेश बीजेपी दे संगठन महासचिव अशोक कौल होरें आखेआ ऐ जे जम्मू-कश्मीर बकाया रौहंदे त्रै लोकसभा हल्कें लेई मेदवारें दा ऐलान पार्टी दे संसदी बोर्ड आस्सेआ कीता जाग, जेह्दी अगुवाई प्रधानमंत्री नरेंद्र मोदी होर करडन। उनें आखेआ ऐ जे कश्मीर दिएं त्र'ऊं सीटें लेई चुनांS बाद आहले चरणें च होने न इस करियै पार्टी कश अजें बी बड़ा समें पेदा ऐ। कौल होरें अज्ज श्रीनगर च आखेआ जे पार्टी नै अजें छड़ी तकरीबन 250 सीटें लेई मेदवारें दी घोषणा कीती दी ऐ। उनें आखेआ जे बीजेपी घाटी दिएं सब्बनें त्रौनें सीटें पर अपने मेदवार खड़े करोग ते ओहू कुसै गठबंधन गी बी समर्थन नेई देआ करदे न।



Vice Prez. Media

उपराश्ट्रपति जगदीप धनखड़ होरें आखेआ जे मीडिया गी ऐसे एजेंट दी भूमिका निभानी लोडचदी दए जेह्दे भारत बारै बेहतर समझ विकसित करने लेई स्हेई नजरिया व्यक्त करने आहले होन ते उनेंगी देशै दी छवि रखाब करने आहले गलत नजरियें दा शिकार नेई बनना लोडचदा। श्री धनखड़ होरें एहू गल्ल नमीं दिल्ली च इक निजी मीडिया हाउस दे पुरस्कार समारोह दरान किट्टु गी संबोधित करदे होई आक्खी। उनें इस गल्ला पर जोर दित्ता जे मीडिया दी विश्ववसनीयता पूरी चाल्ली कन्नै औदे अपने नियंत्रण च ऐ ते उसी लोडचदा ऐ जे ओहू अपने फैसले सनांदे होई राजनीति च शामिल नेई होए। उनें आगाह कीता जे मीडिया गी पंजीकृत, मान्यता हासल जां गैर मान्यता हासल सियासी दल नेई बनने आस्तै सब्बै सावधानियां बरतानियां लोडचदियां न। उनें इस गल्लै पर बी जोर पाया जे मीडिया गी निगरानी रक्खदे होई गलत सूचनाएं पर रोक लानी लोडचदी। उपराश्ट्रपति होरें आखेआ जे सी.ए.ए दा मकसद भारत दे गवांड च धर्म दी बिनाह पर सताए गेदे अल्पसंख्यकें गी राहत हासल करोआना ऐ। उनें आखेआ जे सी.ए.ए कुसै बी भारती बसनीक गी औदे नागरिकता शा वंचित नेई करदा ऐ।



Singh-Ladakh

रक्षा मंत्री राजनाथ सिंह होरें लद्दाख च बड़े मते सर्द हालात दे बावजूद राश्ट्र दी रक्षा लेई थेहारबंद बलें दी सराहना कीती ऐ। उनें आखेआ ऐ जे कदें कदालें स्हाड़े बन्ने पर किश माड़ी घटनां पेश औंदिआं न पर ओह्दे बावजूद राश्ट्र लगातार तरक्की करै करदा ऐ ते एह्दा श्रेय थेआरबंद बलें गी जंदा ऐ। राजनाथ होर लद्दाख च जवानें दे कन्नै होली उत्सव मनाने परैत थेआरबंद बलें गी संबोधित करै करदे हे। उनें आखेआ जे ओहू सियाचिन जाइयै जवानें कन्नै होली दा ध्यार मनाना चाहंदे हे पर खराब मौसम करी ओहू इयां नेई करी सकै। उनें आखेआ जे ओहू भविक्ख च पक्क गै सियाचिन जाइयै उत्थे तैनात जोआनें कन्नै मिलडन जेह्दे बड़ी बेरैहम ठंड दे बावजूद देश दी सेवा करै करदे न। सेना अध्यक्ष जनरल मनोज पांडे होर बी इस मौके उंदे कन्नै हे। जोआनें गी होली दी मुबारक दिंदे होई उनें आखेआ जे लद्दाख भारत दा मान ऐ ते एहू स्हाड़ी दलेरी गी दर्शादा ऐ। एह्दे शा पैहले सिंह होरें जवानें गी मठेआइयां बंडियां ते होली दा रंग लाया।



T.B.Day

अज्ज 24 मार्च ऐ। इस ध्याड़े गी दुनिया भरै च टी.बी डे मतलब तपेदिक दिवस दे रूपै च मनाया जंदा ऐ। अज्जै दे रोज 1892 च डा. रार्बट कोच नै टी.बी जिम्मेदार बैक्टीरिया जिसी माइको बैक्टीरियम ट्यूबर कुलोसिस दी पंछान कीती ही। इस ध्याड़े गी मनाने दा मकसद लोकें च टी.बी बमारी दे बारे च जागरूक करना ऐ तां जे सब्बनें गी इस बमारी, एह्दे फैलने दे कारणें, एह्दे बचा ते इलाज बारै जागरूक कीता जा ते इसी फैलने सवां रोकेया जाई सकै। टी.बी बमारी इस्सै बैक्टीरियम दी वजह कन्नै फैलदी ऐ ते ज्यादातर एह्दे असर फेफड़ें पर दिक्खने गी लब्बदा ऐ। उआं टी.बी, गुर्दे, दमाक, हड्डिएं ते स्हाड़िएं स्पाइंज पर बी असर करी सकदी ऐ। माहनू च बमारिएं दा मकाबला करने आली रोग प्रतिरोधक शक्ति दा घट्ट होना, नसत्ती खराक, सिगरेट

तम्बाकू छिड़कने या लम्मे चिरै थमां शूगर दी बमारी बी टी.बी दा कारण बनी सकदी ऐ। पैहली बारी एह ध्याड़ा 1983 च मनाया गेआ हा ते ओह्दे बाद हर बरे 24 मार्च गी दुनिया भरै च इसी मनाया जान लगगा।

<><><><><><>

Prez. T.B.Day

राश्ट्रपति द्रौपदी मुर्मू होरें टी.बी दिवस दे मौके पर देशवासिएं अग्रे अपील कीती ऐ जे भारत गी टी.बी कोला भलेआं मुक्त बनाने लेई किट्टे रलिए सहयोग करना। राश्ट्र दे नां अपने इक सनेए च राश्ट्रपति होरें इस गल्लै पर खुशी प्रगट कीती जे हर बरे 24 मार्च गी टी.बी बारै जागरूकता पैदा करने लेई एह ध्याड़ा मनाया जंदा ऐ। उनें आखेआ जे इस ध्याड़े गी मनाने कन्ने इस चुनौती कन्ने निब्वडने च औने आलियां दिक्कतां बी दूर होडन। उनें आखेआ जे एह ध्याड़ा असेंगी चेता नोआंदा ऐ जे बेल्ले सिर एहदा पता लगगने ते इलाज शुरू करी देने कन्ने इस खतरे शा बचेआ जाई सकदा ऐ।

<><><><><><>

DGP-Holi

पुलस महानिदेशक आर.आर.स्वैन होरें होली दी पूर्व संझा अज्ज जम्मू-कश्मीर दे लोके जम्मू-कश्मीर पुलसै दे कर्मिएं ते उंदे परिवार आलें ते शहीदें दे परिवारें गी बी होली दी ममारकबाद ते शुभकामनां दित्तियां न। अपने ममारकी स्नेए च डी.जी.पी होरें आखेआ जे होली इक ऐसा ध्यार ऐ जेदा आयोजन भाईचारे, सद्भाव ते एकता दे जज्वे गी मजबूती प्रदान करदा ऐ। उनें आखेआ जे इक पुलस कर्मी होने दे नाते स्हाड़ा एह टकोहदा फर्ज ते जिम्मेवारी बनदी ऐ जे समाज च हिर्ख-प्यार, आपसी सद्भाव ते इक दुए दा सम्मान करना, इनें सारिएं भावनाएं गी मजबूती प्रदान करना ऐ।

<><><><><><>

Onion Export

केंद्र सरकारै गंडें दे निर्यात पर रोक गी अगले हुकमै तोहडी बधाई दित्ता ऐ। गंडें दी घरेलू उपलब्धता बधाने ते एह्दे भाएं गी काबू च रक्खने आस्तै एह फैसला लैत्ता गेआ ऐ। विदेशी बपार सरबंधी महानिदेशालय D.G.F.T. नै आखेआ ऐ जे गंडें दे निर्यात पर रोक 31 मार्च 2024 तगर ही ते हुन इसी अगले आदेश तोहडी बधाई दित्ता गेआ ऐ। पिच्छले बरे दिसंबर च सरकार नै गंडें दे निर्यात पर रोक लाई ही। उआं बक्ख-बक्ख मामलें दी बिनाह उप्पर दोस्त मुलखें गी गंडें दे निर्यात दी इजाजत दित्ती गेई ही।

<><><><><><>

Tulip-Garden

कश्मीर दे ट्यूलिप गार्डन गी कल आम लोके लेई अधिकारिक तौर पर खोली दित्ता गेआ। अधिकारिएं मुजब इस बरे ट्यूलिप गार्डन च 5 नमीं किस्में दे फुल्ल होडन ते ऐगती बक्ख-बक्ख किस्मै दे तकरीबन 17 लक्ख फुल्ल होडन। फुल्लें दी काशत आहले मैहकमे नै बी इस गल्लै दी तस्दीक कीती ऐ। अधिकारिएं मुजब ट्यूलिप गार्डन दी खूबसूरती दिक्खने लेई मुलख ते बक्ख-बक्ख हिस्सें सनें विदेशें थमां बी सैलानी ट्यूलिप गार्डन दी खूबसूरती दा नजारा दिक्खने लेई उत्थे पुज्जा करदे न। अधिकारिएं आखेआ ऐ जे औने आहले दिनें च बक्ख-बक्ख किस्में दे होर फुल्ल खिड़ने पर ट्यूलिप गार्डन दी खूबसूरती गी चार चन्न लगगी जाडन। जबरवान पर्वत श्रृंखला दी गोद ते डल झील दे कंडुे पर स्थित ट्यूलिप गार्डन च लाल, पीले ते गुलाबी रंग दे खूबसूरत फुल्ल सैलानिएं गी अपनी बक्खी आकर्षित करै करदे न।

<><><><><><>